

բավօրք, փէսախալէրն ու մի քանի մտերիմ մըկըռնէրք: Կրկին զորքանչը հյու-
րասիրում էր սրանց շընթրկահացավ:

Կիրակի առավոտ հարսին տանում էին տղայի տունը: Երբեմն այս լինում էր նախորդ երեկոյան, աղջկա տանը հացը վայելչուց հետո: Առավոտվանից բոլոր հարսնէվօրնէր հավաքվում էին հարսի հոր տանը և նախաճաշ անելով, պատրաստվում էին ներկա գտնվելու աղջկա հոր օջախից հրաժեշտ տալուն և նոր օջախի մեջ մտնելուն: Հարսին հայրը բերում էր ձեռքից բռնած և հանձնում քնիվօրի հորը ասելով՝

«Տվա քու վօրքուտ. տար անանքըրա՝ ավանդըդ: Խէրը տէս, բարօվ վայելիլին»:

— Սրանից յէտ մէր վօրքին ան. աչքի լնուի պէս կը պրհպանէնք,— պատասխանում էր տղայի հայրը:

Աղջիկը համբուրում էր հոր և մոր ձեռքը: Տղան այդ տան բոլոր հասակավորների ձեռքերն էր համբուրում և կանգնում նորահարսի կողքին: Ապա հեռանալուց առաջ աղջիկը, շատ դեպքերում փեսան էլ, համբուրում էին իրենց օջախի, քօռէնի շուրթը, և նորապսակների զույգը ուղևորվում էր տղայի տունը կրկին գտնա-դավալավ, երգ ու պարով, մըկըռնէրավ շրջապատված, կըրկին թագուհին գնում էր թագավորի ետևից, հարսնէվօրը բռնած էր ունենում տղայի փեշից ձգած նորահարսի կրծքի առջև, որ ոչ ոք միջոց չանցնի: Կրկին աղջիկը միշտ տղայի ետևից գնալով՝ ցույց էր տալիս, որ կապված է նրա հետ և պիտի նրան հնազանդվի: Կրկին ճանապարհին բարեկամների տներից քիֆն էին դուրս բերում: Եկեղեցու մոտից անցնելիս նորապսակները դուռը համբուրում էին: Եթե տղայի տունն էին գալիս ձիով, երկուսն էլ պիտի ձիուց իջնեին արևելյան կողմից:

Այդ գնացքից առաջ արդեն հարսնախալէրը աղջկա օժիտը բերած էր լինում: Նա ձիուց շէր իջնում, մինչև որ տղայի տանեցիք բերելու համար մի որևէ նվեր իրան չտային:

Քանի որ նոր զույգը կոչված է բեղմնավոր լինելու և հատկապես տղաներով տունը լցնելու և այդպիսով ընտանիքի աշխատող ուժի թիվն ավելացնելու, իսկ նորահարսը բացի այդ պիտի լիներ ժիր տնտեսուհի, հարսանեկան ծիսակատարությունների մեջ ամեն առիթով դիմում էին այնպիսի մոգական՝ հմայական միջոցների, որոնք նպատակ ունեին նորապսակների մեջ համապատասխան ունակություններ զարգացնելու: Երբ հարսանեկան հանդեսը մոտենում էր տղայի տան դռանը, նոր զույգի գլխին մի բարձր տեղից՝ սովորաբար կտուրից, շաղ էին տալիս ընկույզ, կաղին, կտօղէն, շազանակ, պտուղներ, որոնք մըկըռնէրը ու երեխաները իրար ձեռքից խլխլում էին: Հավատում էին, որ դրանք իրենց մեջ բեղմնավորելու և բազմանալու ուժ են պարունակում⁴⁶: Սկեսուրը դուրս էր գալիս դիմավորելու յուղի պուլիկը ձեռքին, երեք անգամ պտույտ էր գալիս նոր զույգի շուրջը, իբր թե իրան մատաղ է բերում նրանց երկարակեցությանը: Երբեմն նրանց ոտքի տակ պտուկեցնում էին մի ոչխար և հաճախ հենց այդտեղ էլ մորթում: Վերջին դեպքում էլ արչան մեջ թաթախում էին զրպանի դանակը և լեզվակը ծալում, որպեսզի ապահովված լինի տղայի առնական ընդունակությունը: Այս մատաղավ տունը պիտի պահպանվեր, շարիքից և տան ոգիները պիտի սիրաշահվեին: Սկեսուրը յուղի պուլիկը առաջարկում էր հարսին, որպեսզի սրա գալովը տան յուղը

⁴⁶ Այլ հայաբնակ վայրերում շաղ են տալիս նաև ցորենի հատիկներ: